



隨齋紀程卷四



隨鑿紀程卷四

一等編修官兼攝內閣大書記官從五位川田剛撰

九月九日。夙發青森。黃稻滿野。青山四周。其特秀者  
為八甲田嶺。石江村民江渡茂吉墾闢草萊。戶口  
滋殖。左大臣召見賜褒狀。涉新田川。茅茨連簷。北  
岡有金商吉次宅址。按平治物語。源平盛衰記。並  
曰。陸奧金商吉次來往京師。源廷尉幼時佯為其  
僕東下。依藤原秀衡。今二盤三陸。有稱吉次宅址  
者數處。不知孰是。抑古者佐渡礦坑未開。海內產



陸奧縣志 卷四  
金獨推陸奧。徵之舊誌。天平感寶元年。陸奧小田郡始貢黃金。見續日本紀。及萬葉集。陸奧歲貢沙金三百五十兩。見延喜式。王政漸衰。陸奧貢金不絕。見小右記。中右記。平重盛納陸奧氣仙郡貢金一千三百兩於宋國育王山。見平家物語。後鳥羽帝鑄佛像。徵黃金三萬兩於陸奧。見東鑑。東奧州產黃金。見宋史及東西洋考。彼齎黃金往販上國。目為金商。乃賴氏外史作鐵賈。殊失其實。蓋歐九能文。不甚讀書。一部外史間多踈謬。學者

奉為圭臬。何也。白旗野石徑礮确。皇上騎馬。衆乃徒行。踰川合坂。十盤。鶴坂。十二盤。四山皆在眼下。獨梵珠嶽。屹立西方。鶴坂舊曰津輕坂。寬喜中。津輕秀直為安東氏所亡。其子秀榮潛跡焉。以業燒炭。掘得沙金。獻之天朝。子孫封侯。進秩十萬石。因改今名。去歲官起工。開新路。起自其第一盤。沿牧川。鑿竇山腹。直達大釋伽驛。今未告竣。仍由故道。驛南地闊。邨落相接。涉一水。則浪岡驛。上游有城墟。天正中。北畠顯邨居之。為津輕氏所滅。顯

邨伊勢國司源守親之後。土人尊曰波岡御所。今州人山崎某自稱其苗裔。家傳元亨帝旗。

延元帝詔書。大塔王衣袖。及系譜一卷云。驛內歧路。右通藤崎。有安東氏城墟焉。左過邨元坂。石塔聚立。田間者二處。往年土人闢荒發掘。石毀字滅。或為長慶帝陵。或稱北畠氏墳塋。皆臆度耳。

南去二里。曰黑石驛。列肆齊整。人口六千。汗石川發自櫛岑蘆柄兩山。西流繞驛。南逕藤崎。入岩木川。田土肥沃。所產嘉穀。推為本州第一。明曆中。津

輕為信四世孫信政。割地五千石。封叔父信英於此。後世進秩萬石。中興納土。士民建祠祀信

英。號黑石神社。是日請左大臣臨視學校。又構小亭於社側。迎蹕奏古樂。亭負邱枕川。平沙渺

渺。長橋伏波。東南有千德氏城址。昔者千德政氏叛南部氏。屬津輕為信。族人政武據田舍館城。不降。為信大舉來攻。乃與壯士三百三十餘人逆戰。皆死之。後十餘年。為信悉平隣敵。設法會。祭彼我將士戰亡者。有一婦人。登壇拜政武靈位。朗誦祭

文。伏刃而死。卽其妻小山内氏也。蓋小山内氏欲  
爲夫復讎。百方伺釁。知事不成。遂及於此。烈哉。有  
斯夫而有斯婦也。猿賀神社。在猿賀邨。殿宇宏麗。  
圍以深林。此社創建於大同二年。治承中。鎮守府  
將軍藤原秀衡修補。建武中。國司源顯家更造。及  
津輕氏興。尤致崇敬。或曰。仁德帝時。上毛田

道擊蝦夷敗死。其靈爲大蛇。吹毒殺敵。因祀之。角  
鹿郡。已而郡中洪水。有人夢其乘桴來此者。爲建  
小祠。後二百年。坂上田邨麻呂征蝦夷。禱焉而得

神助。大造殿宇。然徵之舊史。田道死於伊寺水門。  
說者謂伊寺卽夷瀟。其地在上總國。而田邨麻呂  
北征至閉伊。又城于膽澤。于志波。其地皆在巖手  
縣。則地勢懸隔。與此無涉。無乃是齊東野語乎。抵  
八幡崎。觀土人使馬墾田。初土俗耕田專用人力。  
官招老農於東肥。教以馬耕。未數年。民知其便。各  
郡建馬耕傳授所。此卽其一。老子云。天下有道却  
走馬以糞。信哉。平川橋長五百餘尺。其水發自矢  
立嶺。逶迤北流。至藤崎。與汗石川合。入岩木川。橋

東曰境關。西曰高崎。彌望平野。岩木山延袤跨兩郡。芙蓉挿空。高四千餘尺。宛然肖駿之富士峰。呼為津輕富士。過和德村。駐蹕弘前。人烟稠密。百貨輻輳。官署。學校。神祠。佛宇。連薨鱗次。分為七十九街。中央一阜。喬木成林。有故城。津輕信牧所築。東西五町四十間。南北八町四十六間。石壘三層。塹濠四周。牙城以外。又有五郭八樓十三門。西隔巨川。對岩木山。阡陌連焉。舟楫通焉。初信牧父為信。豪爽多權畧。用兵拓疆。東至狩場澤。南達碓

關。西北限以大洋。土壤肥美。加以魚鹽之利。豐關白遣前田片桐諸將來檢地。為信不告。以實德川氏秉政。定諸侯封邑。秩僅四萬七千石。及為信玄孫信政襲封。起徒闢荒。疏溝洫。築堤防。所墾田十四萬石。并算舊田。有二十九萬六千餘石。而秩尚仍舊。雖後世增至十萬石。名實未稱。王政維新。列藩納土。賜其主以舊封租額十分之一。於是津輕氏多祿。亞所謂十八國主者。宜乎城市殷富。東奧推為一都會也。此地多物產。尤名漆器。質堅

彩美。號為津輕塗。前年市店失火。延燒千餘戶。今復舊觀。後后者四集歡呼。及夜棚車懸燈。耶許推輓。鬧熱如湧。余避喧賞月客樓。會下澤保躬以諸文士來訪。賦詩揮毫。四鼓始就寢。保躬嘗在東京。執贄吾門。性樸直。好讀國典。尤熟悉東奧治亂。余錄沿道故跡。拾遺訂誤。與有力焉。大隈參議至自十三湖。湖距此十五里。在岩木川下流。周圍七里。衆水匯聚。餘勢溢注於海。瀕湖邨落。歲被水害。於是土人僱工疏鑿。參議自函館航海往觀。具奏其

狀。

十日朝。車駕臨裁判所。所長判事中御門經明奏賀箋及事務一覽表。賜酒饌料於判事檢事以下四十一人。左大臣與大木參議等。巡視中學。醫學。師範學校及東奧義塾。余與川村正平游步城内。詣八坂神祠。祠背設招魂場。祀舊藩士死於丁丑西征之役者六十七人。有碑。三條相公題國詩。左大臣篆額。是日刻成建之。賜金遺族。有平澤與吉者。戊辰從軍。創痍未癒。遣侍醫診治。賚以金幣。

嗚呼。將軍吃傷。士卒致死。況萬乘之尊。撫恤如此。一朝有事。寧有不捐軀報國者乎。未刻。啓

蹕。渡蓬萊橋。平野曠闊。曰千代松原。天和中。藩侯過此。見沙礫滿地。無樹可倚。乃起徒修路。移栽釋松數萬株。今綠葉成陰。行旅取涼。遺惠及人。亦遠矣哉。路右有邱。稱千歲山。設

小次焉。柱椽不斲。蔀以芒花。邱下板屋。羣下所憩。題古歌一首曰。波太須珠寸。尾花逆葺。黑木用。造有室者迄萬代。按波太須珠寸。芒也。尾花其花似尾也。逆葺葺屋

以芒。上花下根也。黑木。樸也。言用材不斲彫。造有室者迄萬代。猶曰其所造家久存至萬世也。此歌元正上皇幸左大臣長屋王第時御製。見萬葉集。今小次構造。本乎歌旨。古雅可愛。踰百年坂。涉水即平川之上流也。淺沙清瀨。歧為三派。各架小橋。南崖嶄絕。古木森立。津輕舊記。永祿十二年為信襲攻南部。高信於大佛鼻城。即此矣。過鶴坂。抵大鰐村。觀所謂欵桂樹者。枝葉扶疎。繚以木欄。本居宣長玉勝間曰。大鰐大日堂有靈樹。高十丈。



大四圍。花葉似萩。枝幹似桂。卽是也。或謂是扭也。爾雅釋木。䟽。扭。一名檇。神道講義。岩間某。爲著大檇辨。恨余不解本草。不能決其是非耳。藏館驛與大鰐接。阿闍羅山盤踞其南。長溪縈回。有溫泉出焉。治瘵疝疥腫諸病。居民數十戶。待浴客爲活。去歲失火。一市蕩盡。是夕次於此。賜金賑恤。又分遣羣下。就館隣里。余與金井大書記官宿於本驛。有來乞書者。輒謝遣。偕浴溫泉。月下風詠。納涼溪橋。意殊爽然。

十一日。渡稻荷橋。過九十九森坂。足指漸仰。碇關驛。在山間。比屋二百。亦罹火災。賜金賑之。驛外地。巖罅石縫。間栽蕎麥。踰船岡。湧滌匯聚。渡橋右旋。老杉成林。林盡而坂。坂盡而溪。斜徑高低。與溪轉折。一橋已過。一橋復來。岝嶸對峙。頭戴一線天。盤路入雲。一步一喘。螺旋而登。八九町。踰矢立嶺。則坂峻。舉趾急降。勢如轉丸。欲止不止。植欄路傍。以防顛墜。此嶺右連甚吉森。界奧羽二州。昔者弘前藩據險設塞。危巖嶮巖。溪澗交錯。號爲四十八流。

曲蹊一縷。緣梯躋攀。及藩廢。山北屬青森縣。山南屬秋田縣。縣士日景辨吉。首唱謀開鑿大路。於是兩縣協議。官民捐貲。丙子經始。丁丑告竣。削仄為平。改迂為捷。里程視舊減什六云。頓陣塲臺。涉下內川。岡巒起伏。沿水南走。綠樹白砂。岸遠流淨。雙嶂對峙。呼為男女峰。左折渡橋。人烟聚簇。曰白澤驛。文政中。有下斗米將真者。與死士數人潛匿此地。謀要擊弘前侯寧親於途上。事覺處斬。將真者盛岡藩士。任俠善武藝。初藩祖南部信直疾津輕

為信背。已殺父。割據一方。以其先修貢豐臣氏。列為諸侯。不得加兵。吞恨以歿。至是為信十世之孫寧親。進秩叙四位。任侍從。而信直後裔利用。年少爵卑。將真漸憤。因有此舉。乃津輕家傳則曰。為信八世祖秀則與其子威信孫元信。並為南部氏所害。為信報讎。克復舊業。非叛主攘地。兩家子孫至今聚訟為一大疑案。修史者宜直筆無左右其祖可矣。一里抵釋迦內邨。有植物試驗場。即辨吉所建也。辨吉大闢荒蕪。闔鄉翕然。竭力農桑。允承蔬

精選種子。至收穫。又驗其嘉否。論究得失。是日場內小邱。構亭子。板屋四阿。設御榻焉。榻以墾地所掘木根造之。金釘鑄菊花。覆以錦褥。邱下鑿池養魚。曲榭臨水。倚柱四望。田疇平敷。西有高木山。東有鳳凰山。一水西來。繞片山。與下內川合。南折入米白川。謂之長木川。出場門。田婦羣刈早稻。今歲豐熟可知矣。渡長木川橋。次大館驛。舊秋田藩公族大夫佐竹義純采邑。戊辰之亂。盛岡兵來襲。義純力戰死之。邸第市廛悉爲灰燼。今驛背高

阜。永黍離離。卽其城址。而士庶家復舊者千四百餘戶。

十二日。早發涉飯田川。卽下內川之下流也。西行四里。歷邨五。而綴子戶口較多。早口次之。岩瀨又次之。早口邨有鉛坑。工部省所轄。有牧場曰平瀧。原曠林邃。四圍植柵。牧牛馬百餘匹。渡川六。皆細流。架板橋。踰坂二十五。其峻急者曰塞神坂。曰赤坂。赤坂臨平野。宜遐矚。其屈折者曰驅揚坂。故道險峻。今通車騎。鷹巢驛在綴子邨南。距阿仁礦坑七

里居民二百餘戶。有勸業試驗場焉。又二里。過小  
繫驛。林巒綿亘。西接加護山。循林麓左旋。踰戀坂。  
蜿蜒而登。彩虹飲溪。長五十尺。白板朱欄。名曰寒  
流橋。渡橋漸入仙境。初余讀白井真澄游記。稱此  
地竒絕。謂文人狡獪。蜃氣現樓。其實不必如彼。今  
始闖門戶。未窺堂奧。既已覺所見愈於所聞矣。攀  
馬揚坂。怪石層累。虎踞獅擊。筋骨怒張。不見寸膚。  
矗者攢劍。銳者植圭。老松古檜。皆生自石罅。橫枝  
倒垂。欲與石偕墜。為葛藟所縛。一髮挽千鈞。岌岌

乎殆哉。已而坡坳。而句廉。右逼峻嶒。左俯深邃。進  
至絕頂。巨巖中拆。成凹字門。門外郭公坂。地勢急  
下。斜徑曲折。傍設朱欄。顧瞰原路。米白川來自小  
繫。奔湍激怒。與石相搏。餘勢滾滾西注。遠達野代  
港。而竒峰競秀。近在南岸。以其古祠祀造化七神。  
故稱七座山。或云。座倉邦音相近。方言山頂謂之  
倉。今曰權現倉。曰烏帽倉。曰蓑倉。曰芝倉。曰三杉  
倉。曰大倉。曰松倉。凡七峰。合稱為七倉山。山脚水  
歧三叉。藤琴川發源。津輕郡界。南流十餘里。逕郭

公坂下。至此與米白川合。白砂清流。長橋伏波。舟筏來往。水禽聚散。沿涯有村。南曰荷揚場。北曰矢坂。矢坂以北。連山起伏。隔水東對加護山。山上有高岩觀音堂。慈覺大師所創。又有男殿女殿。三十一石佛之奇。恨路遠不能遍探秘奧也。荷揚場距小繫驛一里弱。往時險艱。劣通樵徑。行旅買舟溯洄。急灘轉折。動輒致覆沒。於是官民協議。捐貲三千八百六十圓。鑿開道路。去歲五月起工。十月告竣。伐木煨石。峻者夷。狹者寬。曲者直。危者安。是日

上御板輿。前騎後乘。緩轡陟降。紅旗閃閃。隱見乎古木怪巖之間。士女來拜威儀者。從川畔仰瞻。恍如羣仙乘雲行空。僉稱爲未曾有也。二品親王奉旨代巡工部所轄製礦場。從者余及西四辻侍從以下若干人。從郭公坂下。右折沿藤琴川。綠樹繞邱。大厦臨水。工部權少書記官丹羽維孝。率僚屬迎門。延至中堂。礦師德國人墨格兒氏進謁。親王曾游歐洲。習熟彼邦語。將命不藉舌人。本場用阿仁太良諸坑所製銅銀鉛塊。再加精煉。業分數局。

曰鎔銀。曰製銀。曰合鎔銅鉛。曰南蠻鎔法。曰粒銅。曰精鉛。曰丁銅。工役多用婦女。皆紺衣。窄袖縛袴。有淘沙者。有注水者。有舉杵碎礦者。有持鐵叉添炭火者。有司頤使。左右唯命。凡土著執業者六十戶。男女三百八十口。歲獲丁銅五十八萬千二百磅。精鉛四十二萬八千四百五十磅。精銀一萬六千四百八。晏子六分三厘。經費出納。具載維孝所上事務一覽表。維孝又上製礦器小式。因賜官吏及墨格兒氏酒饌。事畢。復由舊路歷荷揚場。朝

行宮於二井驛。是夕縣令石田英吉就杉宮內大輔。請賜名加護山新道。大輔使余撰字。奏聞。乃命曰後坂。

十三日。陰。發二井驛。涉米白川。人家一帶。古祠倚邱。相傳文治之役。藤原泰衡欲奔蝦夷。過此至比內二井柵。為部兵所戕。土人憐之。建祠藏遺兜。稱兜神社。東鑑作比內郡贅柵。二井贅音相近。今本州有比內莊。無比內郡。即徵之。延喜式。倭名類聚抄。亦不有也。然康永中。足利尊氏封安東兼季。以秋

田山本比內三郡。則當時或建爲一郡。伴氏陸奧郡數考。特據切要集。屬之奧州。誤矣。路左有鹽井。徑三尺。底淺泉湧。烹肉醃蔬。其味頗美。然煎煉成鹽。薪炭功費。得失不相償。文化中。茂木知教建國字碑。獨記靈異。不記鹽質。今徵之天工開物。鹽產數種。而海池井三者居多。蜀中鹽井。周圍不過數寸。其上口一小盂覆之。有餘。深必十丈以外。乃得函信。吾友竹添漸卿嘗游蜀中。親視其狀。亦云。深二三百尺。廣不過尺。蓋彼取地底所蘊。切忌函氣。

游散。此則口闊水溢。池鹽也。質既不同。製法隨異。然本邦四周皆海。煮海有餘。不必費力於井。與池也。登島坂。降大堤坂。田野闢。道路修。天明中。古河辰隨幕府巡檢使。經過本道。云地荒民窶。風俗卑陋。洵爲夷蠻。今稻雲彌望。雞犬相聞。學童紅女。鮮服迎駕。聖德光被。於是乎見矣。晚次能代港。能代日本紀作渟代。三代實錄作野代。古爲一郡。後屬山本郡。封建時。秋田藩置市尹一員。監察二員。又遣士卒二百五十人。交番此戍焉。地瀕大海。

帶巨川。多產鮭鯧。商舶雲集。市肆櫛比。所製髹器。以精良聞。蓋邦人巧於用漆。夙為海外諸國所稱。不特茲土也。嘗考其權輿。昔者日本武皇子。戲折樹枝。黑汁滌手。因命舍人床石足尼。採而為物采。授足尼以漆部官。事見以呂波字類抄。則其所由來舊矣。其後有漆部連。漆部造兄者。並督漆工。大寶元年。更置漆部司。令諸國貢漆。又課民栽漆木。上戶百根。中戶七十根。下戶四十根。於是都鄙爭造漆器。歷世愈久。執業愈精。至近世其尤著者。曰

根來塗。曰吉野塗。曰輪島塗。曰黑江塗。曰日野塗。曰若狹塗。曰南部塗。曰津輕塗。曰會津塗。曰日光塗。曰春慶塗。曰飛彈塗。曰野代塗。春慶者泉州堺浦人。以妙製淡黃色。著於天授弘和間。所謂春慶塗是也。寬永中金森氏封飛彈。命漆工造器。用春慶遺法。世號飛彈春慶。既而飛彈工人山打三九郎。來此開業。世號野代春慶。今二百餘年矣。師弟授受益致精研。余購筆管茶盆數種。光彩透明。果不負所聞。夜大雨。



十四日。衝雨早發。青松林立。取路其間。林盡而坂勢峻。土滑。寸前尺却。踰外岡。疾風怒號。折樹捲屋。溪澗漲溢。殆失橋梁。所過驛站。新修道路。未及堅築。遽遇大雨。輪蹄蹂躪。粘為深泥。此行艱難。未有如今日者。抵鹿渡浦。天霽雲散。右見八龍湖。史稱建久中。藤原泰衡遺臣大川兼任。欲為主復讎。聚兵七千。鎌倉出師來伐。過秋田大瀉。志賀渡。會冰陷。死者五千人。志賀。鹿音相近。大瀉。即大湖也。沿道民家多種甘瓜。味美直賤。天瀨川。邨有內大臣織

田信雄謫居遺址。亦闢為瓜圃。信雄以右府嗣子。受制家奴。真豚犬耳。邨西曰三倉鼻。崇岡臨湖。湖圍二十五里。牡鹿島在其西。本山真山。寒風山。鼎峙爭雄。而東南平遠。荻浦稻田。循水環遶。其缺口一派注海處。架長橋二千餘尺。舟楫來往。釣者弋者。網者。刈藻拾貝者。與飛鷺眠鷗。在烟波浩蕩中。宛然一幅活畫圖也。本郡豪農佐藤某。造亭岡上。以迎蹕。有柳原某者。設場亭側。竹籠養雁。鷺鷺鷓鴣。鳧鴨。水盤養鱈。鯔。鯉。鰈。鮎。鯪。鰻。蝦。蟹。蛤。螺。

龜鼈皆湖中所產。而案上盛土列木偶人。摹全湖地形。及雪中漁獵之狀。網罟筍梁。簑笠笞箬。皚然一色。其風突吹火。濕薪不燃。鑿冰沈網。龜手瑟縮。使觀者凜凜肌膚生粟。夫細民稼穡。粒粒辛苦。而漁獵更甚焉。則本場所陳。片鱗隻羽。亦寓規諷。可不嘉尚乎。傍湖西去。次一日市驛。大川發源十妻森。合馬場中津淺。見諸水。逕驛南注湖。南涯卽大川驛。是夕。衆分館兩驛。有旨電信探問諸州風災輕重。又資金於佐藤某青柳某。某等欲建碑

三倉鼻。傳恩榮於不朽。就余乞文。余以其地名不雅馴。更命曰南面岡。

十五日晴。離驛。昨雨未乾。軟沙粘靴。過下虻川。大久保二驛。曠原百町。矮松千株。青草如氈。有勸業試驗場。種桑藍及蘆粟。富民奈良某出貲造行宮於其側。重屋四阿。葺以檜皮。梁柱榱桷。材皆奇珍。承塵駢銀版。屏障貼泥金。花卉飾門。庭栽野菊。門右設板屋數十間。胡床列焉。紫幕圍焉。美哉輪煥。平生所希覲也。皇上臨憩。游目湖山良

久經中野邨。田疇衍沃。秋稼如雲。涉掘川。及粒足川。午初駐蹕。土崎港。沿海諸處。產鱸。鮓。鮓魚。一名秋田魚。他方所無。味不甚美。特宜糞田。圃養草棉。販之上國。歲收巨利。市廛二千二百五十餘戶。貢川遠來自平鹿雄勝諸郡。西北流二十餘里入海。舟車四通。貿易繁昌。天正中。秋田實季在檜山。使其族友季守此。友季叛。乃攻拔其城而徙焉。實季嘗謁豐太閤。大閤問歲入幾許。對以五萬石。及德川氏秉政。移封奧州三春五萬石地。然閱文

祿壬辰。秋田氏分限牒。公室所收。及士祿祀田。合計得米九萬八千五百八十石餘。而魚鹽銅鐵雜稅不與焉。則封境廣大。城郭規模。蓋有可觀者。今神明祠邊。卽其遺址云。先是二品親王以大隈參議西。四辻侍從等巡視舟川港。港距此七里。在牡鹿島南。居民百八十八戶。三菱輪船會社設倉庫焉。土人有舟木久治者。謀請官建設埔頭。曰。兩羽之爲州。瀕海百餘里。帆檣所集。曰酒田。曰土崎。曰能代。而地平水淺。無禦防風。獨此地暗礁。西走數

十町。外障激浪。據而築塘。以便泊船。勞少功多。利澤遍及數州。親王乃駕小舩。歷覽海口形勢。是日還奏其狀。晚左大臣大木參議等巡視造船廠。小舟數百。分隊競渡。每一舟先渡。輒舉烽報捷。及夜。又為烟火戲。每舟懸玻璃燈。青紅紫綠。光彩陸離。一港喧逐。達曙不已。

十六日。登五輪坂。左曰兩津山。有招魂社。祀戊辰從王師戰死者六百五十七人。勅侍臣納祭粢料焉。社北設演武場。壯士五百。交試刀槍拳法。亦

賚若干金。寺內邨謁古四王社。相傳推古帝

時祀武甕槌命經津主命。配以崇神朝四道

將軍。日本紀所謂齶田浦神者卽是也。然果祀六

神。何以稱四王。况邨曰寺內。類聚國史。又有天長

七年本州地震。四天王寺丈六佛像四王舍皆顛

倒之文。則四王舍訛為四王社。亦未可知。下油田

坂。有第四勸業場。養綿羊及洋種牛馬。內外雜種

牛馬。八橋邨。又有第一勸業場。栽稻麻菽粟瓜蔬

菓木藥草等。蓋土俗耕牧。鹵莽執業。不精究其方。

本縣管內設場五十。交換種子。參檢利害。使其有所自曉焉。本場廣一町七段八畝。官署一區。洋式石造樓上安。御榻樓下掛宋明名畫。別設博物館。陳寶器古筆。器之與畫。余不能辨真贋。唯結城某所藏。南朝詔勅。及室町氏文書數通。為當時筆跡無疑。出場老稚齎集。人家連簷。達秋田縣治。駐蹕焉。秋田。日本紀作齧田。又飽田。古屬奧州。蝦夷所居。和銅五年。割奧越十二郡。建出羽州。而所謂秋田城者。在今高清水岡。置校尉七人。旅

帥十六人。火長二十四人。列士三百人。鎮兵四百五十人。加兵士三百五十人。其城司例以州介充之。稱秋田城介。昌泰以還。廢置不一。鎌倉開府。安達氏世任是職。既而羣雄割據。安東實季居土崎。自稱秋田城介。及德川氏興。實季移封。佐竹義宣代領茲土。始城於久保田。鄉明神山。傳業累世。士民聚居七千餘戶。號為秋田藩。中興廢藩為縣。建本廳郡署。學校病院。及裁判監獄郵便電信諸局。而城壘為陸軍省所轄。牙城東西六十五間。

南北百二十二間。重郭廣袤。繚以壕塹。去秋火災。樓櫓皆焚。猶存壘壁。昔日宏壯之狀可想。城北廣澤山。有平田。篤胤墳。上遣侍臣祭之。賜金遺族。篤胤舊秋田藩士。少游江戶。講究國典。晚年歸藩。弟子益進。蓋所謂國學者流。大抵事記誦詞章。獨荷田東麻呂志在古道。欲排儒釋。更明邦教。加茂真淵起而繼之。至本居宣長。始集大成。篤胤汲流溯源。才大學博。著述五百餘部。其古史徵。古史成文。古史傳。扶桑國考。皇典文彙。玉襟等。遍行於

世。而天朝無窮曆。特賜

乙覽。聲譽藉藉。動朝

野。但強辯喜勝。雖或見疵瑕。要非豪傑不能爲之。戊辰之變。列藩抗命。獨佐竹氏君臣。守義勤王。篤胤遺教。亦與有力焉。宜乎

皇上追思。恩及枯

骨也。熱甚。退就館舍。小松弘毅大友道恒真崎勇助等來訪。乞書者羣至。晚散步市街。閱書鋪。皆免園冊子。而列肆所鬻。木材銅鐵。繡絲綢緞。率係土產。有欸冬搨者。本土欸冬。異於他產。其莖圍一尺。長六七尺。葉大如張繖。白布全幅。搨染一葉。以爲

包袱。又剪莖為薄片。漬以糖霜。味尤美。及夜近郊。揚烟火。戶戶點燈。少女靚妝。三絃太鼓。婆娑行歌。呼為風俗舞。亦平生所未覩。

十七日辰刻。

車駕幸縣廳。石田縣令前驅。樺山少書記官率僚屬拜迎門外。升自正階。

臨御政事堂。大臣參議宮內卿輔以下班列左右。縣令進奏赴任以來施治始末畢。巡覽各局。

出廳門。官吏拜送如例。次

臨女子師範校。縣

令又奏肄業大畧。并上教員生徒名簿。及其所作

詩文裁縫諸品。次

臨講堂。聽男女生徒講書。

化學生試其術。次

臨弘前裁判所支廳。所長

判事中御門經明上訟獄勸解一覽表。及判事補以

下名簿。次

詣八幡神社。社在舊藩城南。初藩

祖義宣建神祠。二字於城內。一祀先世義宣所傳

應神帝御衣。一祀先世義人所寫神像。及藩廢。士

庶相議。移之於此。合為一社。別建祠宇。祀義宣。號

秋田神社。是日壯士數十。馳騎打球。身被甲冑。佩

雌雄刀。背旗母衣。有挾槍者。有持弓者。有橫鐵棒

者各爲古軍裝。出自城門。繞壘三匝。每過社前。伏  
鞍示敬。禮容可觀。次臨秋成社機業場。織者  
繅者。組者。順次就業。別室陳繭。續蠶。連顏。料生絲  
色。絲綾。緞。絹。縞。諸品。凡幹事十人。職工百四十餘  
人。婦女居多。男子僅僅乎四分之一矣。先是官廢  
士祿。授金券。歲給利子。而典賣任意。往往有失恒  
產者。舊藩士百三十人。相約創此社。以興墾田。養  
蠶。紡織。諸業。官嘉之。貸以貲本。於是擇地分任。各  
執其事。此卽其一也。距此一里。貢川與大平川合。

水成燕尾。其地曰川尻。有川尻組蠶業會場焉。組  
卽團結也。藩政時。有金秀興者。掌度支。納部民關  
喜內議。大闢荒蕪。遍栽桑樹。封內六郡。造蠶室二  
十區。又招諸州良工。使土人習執機杼。秋田織之  
名。大噪海內。旣而歲饑。餓莩載塗。傾貲賑救。工費  
不給。漸致衰廢。其子秀安克繼父志。與喜內等百  
方計畫。遂復舊業。及外舶通商。伊國歲購我蠶。連  
黠賈貪利。欺售粗品。川邨某加藤某等。與同業百  
五十人立規約。務精其制。取信內外。又遣人伊國。



學洋語。直與彼商市。不得牙僧居間為奸。敝習一變。頓增聲價。去歲所製蠶連一萬八千六百餘紙。率皆鬻之海外。得直金十餘萬圓。可謂盛矣。午刻。幸會場。廣廈數十間。樓上陳繭絲蠶連。憑欄騁觀。左右曠野。隔川松林。岡巒斷續。漁舟鼓柁。鮮鱗登罾。風景清絕。使人留連不能去。晡時回。

躡縣治。縣士信太某等死於戊辰丁丑兩役者二百四十九人。賜遺族以祭柩料。豪商那波某。祖孫三世。育嬰救災。賑恤鰥寡孤獨。全活者甚衆。賜褒

狀及紅白縮緬二匹。舊藩老佐竹義壽獻傳家寶刀。賜銀杯三箇。金五百圓。大川某母年八十餘。獻手製綿布。產馬會社貧荒。木某獻駒二匹。並賜金有差。左大臣以大木參議。金井大書記官。岩佐侍醫等。巡視病院。

十八日。涉大平猿田二水。踰橫山坂。岩見川迂回。貫注戶島和田二驛間。渡三橋。長者四百餘尺。次者三百尺。又次者二百四十尺。登宮崎坂。曠原渺漠。曰大張野。曩時秋田藩墾闢移民。未幾年。饑民散。

荒蕪日久。秋成社請官借地。開圃二百七十餘町。栽蘆粟旱稻大豆燕麥馬鈴薯茅茨五十。人口二百。設小學及農校。養生徒六十人。又開牧場。畜牛八十頭。是日迎駕。倚高設小次。側構板屋數十間。爲羣下憩息所。俄而吹角一聲。連揚烟火。近鄉民牽馬三千餘匹來供御覽。老幼攜扶。遠至自數里外。賣餽者賣瓜菓者。張繖陳貨物者。松下巖畔。立錐無地。向之望爲曠原者。頓成一市場矣。下鶴卷坂。涉黑川。小黑川。山徑礚礚。漸

入荒僻。舩岡川發自荒木澤。西南流與淀川偕注貢川。漁人放鸕鷀捕香魚。渡圮橋。矮樹夾路。申初次境驛。田瘠民貧。戊辰兵燹。瘡痍未復。分遣衆員。就館隣里。驛內有韓松神社。祀神功皇后。土人云。物部守屋之亡也。其臣捕鳥部萬。奉遺孤遁。至於此。今祠官卽守屋之後裔也。然萬奮鬪殺追兵三十餘人。自刎。官命斬其屍爲八段。事見日本紀。則謬傳不足辨焉。萬松寺有小倉藩士志津野某等五人墳。皆戊辰從王師戰死者。

陸參系和 卷四  
十九日踰旭坂。荒驛沿水。曰上淀河。永慶軍記。天正十六年。秋田實季發步騎二千。渡舟岡川。據韓松野。與小野寺氏先鋒戰。蓋此地也。上游有荒川礦坑。寬文延寶間。鳩工採掘。車馬來往。因移輪田河。跨壑掘橫淵。諸鄉民置驛焉。居無何。其業頓衰。享保郡邑誌所載。驛戶僅六十。今經兵火。生理蕭條。然近者豪商瀨川安五。請官復興礦業。凡坑穴五十。礦竈百餘。舉職員坑夫雜役。男女一千七百三十口。歲得銅五十萬斤。又闢荒蕪。設市肆。建學校。

開牧場。則餘澤旁及本驛。繁庶或可指日而待矣。渡淀河橋。山路曲折。老樹陰森。降烏頭坂。地平野闊。東去五町。有不動明王祠。懸泉二百尺。稱白絲瀑。瀑南高善寺。大同二年創造。伽藍雖廢。施藥殿觀音堂尚存。其像慈覺大師手製云。灼和野驛在水尺蘆澤二川間。亦罹兵燹。天正中小野寺氏部將灼和野某所居。其城址曰寄騎館。館南一里曰北楢岡驛。又南半里曰神宮寺驛。貢川溶溶。隔水孤峰。祀六所明神。稱神嶽。北岸一帶。人烟聚簇。有

陔餘叢考 卷四  
八幡神社。殿宇古朴。亦大同二年所創。神庫藏元人顏輝畫幅。源奧州白旗。及種種寶器。並不足信。但棟札題曰建久元年。右大將源賴朝再興。則其為古祠可知焉。祠典每歲上元祭神。為逐禽曳綱戲。及期巫祝築壇。列幣帛。設管席。舉驛人集嘗神酒。一人把長竿。起舞曰。餌指舞。分餌指舞。拋百事。分看吾舞。衆相和。鼓吹拍節。謂之餌指舞。又童子行歌。唱千壽曲。每戶授藁一二束。乃造大索二條。繫以許多支繩。目為雌雄綱。及逐禽戲畢。持索至

亭長門前。男女老少。各執支繩。分曹爭引。雄斷則穀熟。雌斷則不登。以下一歲豐凶。此事見六郡祭事記。詢之父老。果信也。渡板橋。玉水兩派。夾一洲。合注貢川。田夫設廬舍。收早稻。或刈或擔。或搗穗。或曝藁。幽風七月圖。宛然在目。顧瞻神嶽。連山截業。爭雄不讓。戊辰之役。澤副總督。率薩長筑豐兵。自秋田移營。叛黨四起。勢頗猖獗。于境驛。于淀河。于川和野。轉戰累月。互有勝敗。而此當其衝。殭屍山積。流血漂杵。今十餘年矣。六龍所過。謳歌

載塗。兵氣銷為日月光。盛哉。聖德。憲宗平淮西。未得專美於前也。經花館。抵大曲驛。驛夾鞠子河。西瀕貢川。舟楫來往。戶口繁庶。先是薩軍之屯於此也。賊率死士乘夜來襲。連發銃丸。事出不意。衆寡不測。一營蹈藉。死者二十餘人。遺墳在長福寺大川寺。而路右一碑。題曰島津久徵者。其隊長也。碑西古祠有五層石塔。崇七尺五寸。三面梵字。其文銷滅。唯元亨三年七月為虎王丸一語。畧約可辨。虎王其人未詳。相傳大曲城主前田道信稱

又左衛門尉。其子五人。長曰又太郎。少游上國。事大將軍足利義輝。留弟利信守城。既而足利氏亡。織田氏興。利信往事之。利信蓋虎王後裔。而金澤藩祖利家。即其近族也。按織田氏霸時。羽州千福前田薩摩守獻鷹。事見信長記。千福即仙北郡。薩摩守即利信。然徵之大閤記。藩翰譜。金澤家譜。利家父祖世居尾州。其系自別。以姓名偶似。故傳會之耳。渡旭河。次角間河驛。旭河又名內河。其源發自白水大穴諸嶺。西北流至金澤西根。合落逢河。

入貢川。驛在河曲。據土崎港上游。數郡運輸所由。物貨流通。民產殷富。兵燹未幾。市街復舊。戶口多於大曲。豪農本鄉吉右望。幸為構大厦。因充行宮。左大臣及金井大書記官與余同館於新川氏。亦豪農也。老儒八代隆太寄寓。授業其子。先是秋田藩士有賀藤士徽者。慷慨憂國。與先師藤森先生友善。隆太即士徽門人。私淑先生。愛及屋烏。一見如舊。北原雅長前田利貞等相踵來訪。詩酒唱酬。即席揮毫。龍騰蛇起。頗雅會也。初州民多種

秔稻。以曝收違宜。販鬻他方。斥為下等米。官諭民。設喬杆笕架。漸改舊習。吉右乃與仙北平鹿雄勝北秋田四郡老農議。釀金購田二百五十町。試驗得失。益擴其法。名曰秋田改良社。是日吉右等獻新穀。左大臣召見。賜褒狀。大隈參議。北條侍從等。巡視荒川礦坑。還具奏瀨川安五採銅闢荒始末。又以日景辨吉墾田修路。竭力耕牧。並授以褒狀。二十日。復渡旭河。行里許。抵六鄉驛。戶口與角間河相若。戊辰之役。賊軍陷橫手城。進至於此。將取大

曲。王師設伏大敗之。斬其將士數十人。驛北故城。慶長中。六鄉正乘所居。及佐竹義宣就封秋田。其父義重營菟裘焉。一夕土寇千餘起攻之。守衛甚少。驅市人放弓銃拒戰。已而援兵四集。寇輒敗亡。遺跡在今熱田祠邊。又有善證寺。寬喜中。兵庫頭源賴政曾孫宗房。為見真大師弟子。造之。宗房九世孫明言重修。建子院八十餘宇。今存十餘宇。藏賴政首鎧。大師真影。照樂寺。平將門後裔兼綱所建。兼綱七世孫某為本州小館城主。其子孝

昭披剃歸佛。石山城之役。助僧徒。與織田氏戰有功。還俗襲父業。寺傳將門旗幟。為寶器。過金澤邨。層巒疊嶂。綿亘數里。茅舍一簇倚山脚。阿彌陀堂。安置木像一軀。名工運慶作。鎌倉執權北條時賴所寄。堂南涉廚河。左攀磴道。嶄巖聳削。松杉刺天。史稱。寬治元年。清原武衡家衡等作亂。據險金澤源。奧州發師環攻。賊眾死守。對壘連歲。遂克之。卽此地矣。絕頂八幡祠。簷宇莊嚴。旁建二小祠。曰神明。曰星堯。並奧州所創。佐竹氏重修。祭祀田。而星

兜祠下埋古冑云。山下隔野。地勢隆起。奧州駐營處。稱弓楯岡。南去一町。老杉獨立。大四人圍。平景政瘞敵屍處。稱高名塚。又南古祠倚高。武衡叔姪望王師處。稱斥候山。山西古柳。蘆葦叢生。奧州見飛雁亂行。知有伏處。稱大沼。沼東十餘町。深草沒澤。武衡潛匿就擒處。稱蛭藻沼。然此種名目。大抵傳會史傳。世歷滄桑。孰辨是非。至其以廚河為廚河。二郎貞任故跡。則謬妄殊甚。嘗徵之陸奧話記。今昔物語。東鑑諸書。前九年之亂。賊軍所有。止陸

奧一州。所謂廚河者。偶與此同名。其地在今陸中巖手郡。山川懸隔。風馬牛不相及。彼果據茲土。仙北酋長擅發本州兵。遠會王師於營岡。寧有此事乎。橫手驛在旭河上流。人烟稠密。街衢齊整。天正中小野寺義道居此。領雄勝平鹿仙北三郡。與秋田氏最上氏爭雄。關原之役。黨西軍國除。寬文十二年。秋田藩封功臣戶邨義連。食一萬五千石。隸以騎士五十步卒三百。子孫襲業二百餘年。戊辰之亂。為叛兵所陷。城郭皆燬。城外有上野介本多



正純館址。曰上野臺。正純之謫於此也。其臣小島定盛從焉。小島卽兒島氏。其系以備後守高德爲始祖。第二世正範。第三世正綱。永享中。從新田義宗於伊豫。第四世光義。事六角氏。第五世定直。第六世定國。第七世信定。事蒲生氏。第八世定德。事京極氏。第九世定次。第十世卽定盛。事本多氏。北徒。子孫爲庶人。改稱森氏。蓋高德事跡獨見太平記。他書所無。或疑爲無是公。藩翰譜據三宅系圖。載其隱參河。生三子。曰高秀。曰高久。曰高貞。而日

本史。南山史並不取。今舉森氏系譜。以博異聞。驛南二里。馬鞍邨。八幡祠。奧州報賽。納以馬鞍。余迂路往訪。古木林立。祠宇傾圮。六郡舊記。馬鞍作馬倉。曰祠東有馬倉氏城址。問之農夫。皆不知。乃取徑田間。追及車駕於醍醐。青松夾路。行旅免暍。寬政中。秋田藩主所植。同時里民曰孫右者。闢荒二萬餘坪。移植杉苗四萬本。又有五右者。勸衆栽楮。今杉林成材。製楮紙。遍販四方。則謂二民遺澤。不讓邦君。亦豈不可乎。皆瀨川兩派。一出自檜

山臺一發於田代小安諸山。至戶波邨。合爲一條。西流入貢川。平鹿雄勝二郡所分。架以板橋。長六百尺。倚欄游目。翠巘映水。烟雲吞吐。涼飈颯然。白雨傾盆。馳入岩崎。是地文祿中。原田大膳所據。一日大膳出師敗歸。其妻開城門。庭列巨楹。呼敗卒勸酒曰。妾欲爲主帥雪耻。汝輩豈無意相助耶。衆踊躍請從。乃與二婢被甲上馬。涉川斬敵將黑澤某。餘兵辟易潰散。父老至今說其勇。雨甚。人馬偕疲。余曰。一婦且敗敵。況吾曹爲兩師過行。可乎。乃

鼓勇進次湯澤驛。驛舊稱雄勝邨。負山帶澤。地占形勝。古者本州設二鎮。曰秋田城。曰雄勝城。續日本紀。天平五年於雄勝邨建都居民。三代實錄。雄勝城置校尉六人。旅帥八人。火長十六人。列士二百二十人。鎮兵二百人。加士二百五十人。卽是也。天文中。小野寺氏居此。後爲最上氏驍將楯岡滿茂所據。及秋田藩建。使功臣多賀谷宣家率兵屯戍。旣而公族大夫佐竹義種代之。子孫世襲。食一萬石。中興撤藩。士庶仍舊。戶口與橫手相若。

二十一日。夙發。林巒斷續。古祠倚邱。祀火結神。大同  
創建。慶長重修。自路上望。簷牙高啄。隱見樹間。宏  
壯可知。踰伊勢堂坂。田疇平敷。邨落相接。初佐竹  
義宣領常陸。秩八十萬石。與毛利德川上杉前田  
島津五氏。並稱為六大國。及削封北徒。所過山谷。  
土瘠民貧。意殊怏怏。至此始有喜色。土人呼為御  
機嫌坂。御機嫌猶曰公悅也。南循貢川。行里餘。渡  
須川橋。其源出自高松嶽。東有田神嶺。古稱雄鬼  
骨山。以其西與羽後州鳥海山相對。又稱東鳥海

山。絕頂古祠。祀雄勝尊。陰曆重陽。州民登攀修祭  
祈年。山背與大室長嶺接。嶺下故道間見礎石。續  
日本紀所謂。天平八年。狄俘八百四十九人。從部  
內色麻柵發。卽日到出羽國大室驛者。蓋此也。小  
野村有寺。安置名媛小町像。曰昔者郡司小野良  
實者。納妾町田氏。生一女。因名小町。少入掖庭。老  
歸舊里。後人建祠藏遺物。文祿兵燹。悉為烏有。而  
手植芍藥。今尚繁茂成叢。小町持彤管。列歌仙。色  
藝雙絕。為海內所艷稱。荒陬僻壤。亦有遺跡。然徵

之古今後選諸集歌什贈答。身跡終始不離京畿。口碑所傳安足信焉。經橫堀邨。涉役內川及桂川。則貢川曲折。二驛夾水。西曰下院內。東曰上院內。日午尚食於下院內。欲巡覽銀山町礦坑。乃從上院內。右過荒町。渡晚成橋。經長倉白狐石大切洞口。渡中橋。大路沿溪。所在廠舍。洋式石造。運機器以火力水力。踰芥坂。即銀山町。吉井工部大輔率屬吏迎。蹕於礦山分局。既而幸五番坑口。有司秉燭先導。漸入夜國。登降屈曲。鞠躬如不

容。其細石層累處。樹柱防崩壞。有採礦者。有汲水者。有擔石塊者。出坑登高察地形。此地舊係秋田藩封境。距上院內一里十八町。萬山繚繞。獨東面開一路。居民五百四十六戶。男女二千三百六十二口。初慶長中。薄井邨人有七郎左衛門者。始探得礦穴。會故敦賀城主大谷嘉隆遺臣邨山則義來住本郡。鳩工開採。其業漸興。後二百載。至文政元年。藩命禁私業為官坑。置吏分職。曰臺所役。曰山方役。曰床屋役。曰吟味役。曰手代。其執工事者。

百餘戶。曰金名工。曰引替。曰新組。曰直本番。曰總中。他有種種名目。中興廢藩。屬其業於礦山會社。尋屬之小野商會。文政以還。至此所獲銀三萬二千九百七十貫。乙亥冬。更隸工部省。建礦山分局焉。悉革舊制。設主記主計技手三課。吏胥工夫。各定俸給。居三年。聘德國礦師四人。議定就業次第及製煉方法。後又聘二人於德國。委以選礦鑛等事。蓋本坑礦質。大抵硫化銀。及硫化安母尼銀。間有硫化鉛。硫化亞鉛。硫化銅。硫化鐵等。古

者礦脈二十一。今存其二。曰本鍾。曰厚身鎗。古者坑口二十。今存其六。曰三番烟口。曰四番烟口。曰五番烟口。曰六番烟口。曰大切疏水洞口。曰彥溜四百枚口。於是更鑿新坑於西山早房等處。縱橫交錯。長六千四百尺。鑿竇道二。長者四百三十六尺。短者百六十六尺。鐵道四千八百九十七尺。水道。大者三千五十八尺。小者三千百二尺。架橋。大者二。小者四。而開大路。自局門達荒町。一里六町。造廠舍。既竣者十一宇。曰客館。五十坪。曰層樓客

館九十八坪。曰器械製作場。五十坪。曰鍛冶鑄物場。五十一坪。及鐵物庫十二坪。曰小棟選礦場。九十三坪。曰大棟選礦場。八十九坪。曰搗礦場。六十一坪。曰起業假役所。九十八坪。曰倉庫。六十坪。曰大棟洗礦場。百三十二坪。曰小棟洗礦場。七十六坪。未竣功者十一宇。曰大棟炭庫。四十六坪。曰小棟炭庫。四十一坪。曰木材庫。二。各五十坪。曰沈澱所。五十坪。曰焙燒所。百二十四坪。曰鎔礦所。九十三坪。曰鞴機械所。二十七坪。曰磨機械所。二十七

坪。曰礦石庫。四十坪。曰分析所。二十二坪。自乙亥冬至今。所費金七十一萬二千八百五十一圓。所獲銀價八十一萬七千三百二十九圓。乘除僅得十萬餘圓。異日土木功竣。器械全備。則除去經費。歲收贏餘二十餘萬金云。晚回蹕下院內。是夜冷甚。挾纒圍爐。氣候殆同東京十一二月。

隨鑿紀程卷四

